



## JUDICIAL SYSTEM MONITORING PROGRAMME PROGRAMA MONITORIZASAUN BA SISTEMA JUDISIÁRIU

### Komunikadu Imprensa

27 Setembru 2024

#### **Membru comunidade Suku Maudemu husu ba JSMP atu fahe informasaun sira iha treinamentu ba iha comunidade sira iha baze tanba importante tebes**

JSMP fahe informasaun ba membru Konsellu Suku, OPS no comunidade sira iha suku Maudemo, Sub-distritu Tilomar, Munisípiu Covalima iha 25 Setembru 2024. Partisipante sira iha treinamentu ne'e hamutuk ema na'in 30 ne'ebé kompostu hosi mane 12 no feto 18.

Objetivu hosi treinamentu ne'e atu hasa'e koñesimentu membru konsellu suku, OPS no membru comunidade nian kona-ba asesu justisa formál, sistema justisa iha Timor-Leste, knaar instituisaun judisiál no judisiáriu sira nian, direitu labarik no serbisu rede referral sira. Nune'e bainhira akontese problema ruma iha comunidade no família, sira hatene ona dalan atu relata ba iha membru konsellu suku sira ka OPS bele jere no refere kazu sira tuir regra prosesuál ne'ebé lei define.

*"Informasaun sira ne'ebé JSMP fahe iha treinamentu sira ne'e bele kontribui ba asegura no promove sidadaun sira-nia direitu atu asesu ba justisa formál, liuliu ba grupu vulnerável sira mak hanesan labarik, joven no feto sira",* dehan Diretór Ezekutivu Interinu JSMP, Sr. Casimiro dos Santos.

Matéria iha parte sesaun dadeer nian kobre definisaun kona-ba lei, definisaun kona-ba krime, natureza prosesu lei kona-ba krime públiku no krime semi públiku ho nia esplikasaun liga ba kazu sira oinsa kazu krime ida mosu iha família no comunidade oinsa keisozu no denunciante atu lori kazu ne'e ba iha parte relavante sira atu halo nia prosesu to'o iha tribunál atu foti desizaun no mós kona-ba tipu pena sira.

Matéria iha parte sesaun loraik nian ko'alia kona-ba akuzadu no vítima nia direitu sira, vítima ba violénsia doméstika, violénsia seksuál, no ofensa ba integridade física nsst. Alende ne'e mós ko'alia kona-ba polísia sira nia kana'ar, Ministériu Públiku nia kna'ar no kompeténsia, Juís (Tribunál) sira nia kana'ar no kompeténsia Defensoria Públika no Advogadu Privadu sira nia kna'ar no kompeténsia. Inklui definisaun kona-ba labarik, protesaun labarik tuir lei Nasionál no lei internasionál.

Iha sesaun lokraik nian, partisipante sira halo diskusaun, halo pergunta, ható'o mós sira nia preokupasaun no rekomendasaun sira relasiona ho sistema justisa formal no kontinua halo treinamentu ba comunidade sira iha baze.

Pergunta no preokupasaun sira ne'ebé partisipante sira ható'o mak relasiona ho kazu divórsiu ne'e krime ka lae, kazu abandonu labarik sira, kestaun kazamentu hanesan kontratu tuir Lei Sivil, kestaun prosesu autopsia ne'ebé kle'ur no nia objetivu ne'e saida, kestaun inan-aman baku oan tuir kontestu kultura hanesan hanorin no kontestu lei krime ka lae no pergunta balun relasiona ho matéria sira ne'ebé apresenta iha sesaun tuir mai mak hanesan knaar juis, prokuradór no defensor sira nian.

**Divórsiu:** hatan ba perguntan ne'e, JSMP eskplika katak kazu ka kestaun kona-ba feen ho laen fahe malu ka divórsiu ne'e la tama iha kazu krime, maibé kazu sivil no bainhira feen ho laen hakarak fahe malu ne'e sira nia direitu no Lei Sivil garante ida ne'e. Lei Sivil prevee ka regula katak kazamentu ne'e hanesan kontratu ida entre parte rua ne'e ka entre feen ho laen, bainhira parte ida ka parte rua dada-an ka lakohi ona kontratu ne'e, kontratu ne'e hotu ona.

**Abandonu labarik:** hatan ba pergunta ne'e, JSMP esplika katak mezmuke fahe malu ne'e direitu feen ho laen nian, maibe bainhira sira na'in iha oan, sira nafatin iha responsabilidade mezmuke fahe malu ona. Bainhira sira la halo tuir sira nia obrigasaun hanesan inan-aman, entaun sira komete ona krime abandonu hanesan prevee iha Artigu 143 Kódigu Penál no mós krime la kumpri obrigasaun alimentár ka fó han hanesan prevee iha Artigu 225 Kódigu Penál.

**Kazamentu hanesan kontratu:** preokupasaun ne'e mai hosi partisipante feto sira no konsidera lei ne'e halo feto sira sai vítima tanba mane sira bele kaben soe feto hela de'it tanba lei ne'e loke dala ba ida ne'e. Partisipante mane sira konsidera lei ne'e di'ak tanba la obriga feto ka mane atu nafatin hola malu mezmuke parte ida lakohi ona ka parte rua lakohi malu ona.

Hatan ba preokupasaun ne'e, JSMP esplika katak lei ne'e atu asegura direitu no liberdade ema idaidak nian atu bele deside saida mak nia hakarak ba nia an rasik, mezmuke ita haree hosi parte lisan ka kultura no relijiaun hanorin valór ne'ebé kontráriu ho lei ne'e. Lei iha karater obrigatóriu katak hothotu iha obrigasaun atu halo tuir no lei ne'e só bele muda hosi polítiku sira iha Parlamentu Nasionál. Ita nia lei sira ne'e barak liu adota hosi nasaun seluk nian, liuliu Portugal, entaun iha buat balun ne'e la refleta ho di'ak Timor-Leste nian kontestu no realidade.

**Inan-aman baku oan:** Hatan ba kestaun ne'e, JSMP esplika katak bainhira inan-aman baku oan ne'e krime. Ida ne'e, inan-aman komete krime violénsia

doméstika ne'ebé regula iha Lei Kontra Violénsia Doméstika no mós krime maus tratu ba menór ne'ebé prevee iha Artigu 155 Kódigu Penál.

**Pergunta sira selu:** Pergunta sira seluk tanba relasiona ho sesaun tuir mai, entaun JSMP la halo esplikasaun kedas no hein ba matéria tuir mai.

*Treinamentu ne'e realiza hosi JSMP liuhosi Programa USAID Timor-Leste Advocacy Activity for Good Governance.*

Atu hetan informasaun kompletu favor kontaktu:

Casimiro dos Santos

Diretór Ezekutivu Interinu JSMP

Diresaun e-mail: [casimiro@jsmp.tl](mailto:casimiro@jsmp.tl)

Telefone: (+670) 33238883 | 77257466

Website: <https://jsmp.tl>

[info@jsmp.tl](mailto:info@jsmp.tl)

[@pengikut@sorotan](https://www.instagram.com/pengikut@sorotan)